

Y r
147



Biblioteka Uniwersytecka
we Wrocławiu

Wratislaviana

Yr 147

82798

BUW.

1568

July 14

yr 144

82798 Q56

Der Kayserlichen
Stadt Breslaw/
new auffgerichtete
Infection Or-
dnung.



Annorum CHRISTI:

1568.



Cabinet
Stapo - Lányeki

82798



SE
Rath-
manne
der Stadt
Breslaw/
u. Entpit-

ten N. allen vnd jeden vnsern Bür-
gern/ Vorwandten/ Inwonern vund
Vnderthanen/ Vnnsere besondere
Freundschaft/ geneigten gutten Wil-
len/ Gunst/ vnd alles guttes. Vund
fügen Euch freundlicher gutter mei-
nung zu wissen:

SD vund als der Ewige gerechte
GOTT/ vmb vnser sünde vnd misse-
that willen/ vns nicht allein das vor-
lauffene vnd jetzige gegenwertige Jar/

A ij mit

mit seiner Väterlichen Rutten gedre-
wet/ Sondern auch nu mehr (weil
layder Gottis/ schlechte oder wol gar
keine besserung erfolgen wil) mit sei-
ner Straffe fort fehret/ sich mit seinem
ernsten vnd gerechtem Zorn erzeiget/
Vnd also die anfallende Seuche der
Pestilenz/ vber vns vnd ganze ge-
meine Stadt/ vorhenget/ vnd kömen
lesset. Als haben wir betrachtet/
vnd zu gemüt gezogen/ was diß fals
vnsrer Ampt/ dorein wir von Gott ge-
setzet/ ersodere vnd haben wolle.
Vnd so dann vnzweyffenlich war vnd
gewis/ Das der güttige GOTT/
jeder zeit/ von anfang der Welt/ wie
Er die sünde hasset vnd straffet/ Also
auch hinwider/ wenn sich die Menschen
zu ihm bekeren/ reu vnd leid vber ihre
sünde vnd missethat haben/ aus herz-
licher vnd Väterlicher Liebe/ sich ihrer
erbarmet/

erbarmet/ sie wider zu Gnaden an-
nimpt/ vnd die Straffe vnd Rutthe
genediglich vnd Väterlich abwendet/
Wie er vns solchs/ durch den Prophe-
ten Jeremiam zusagt/ vnd vortröstet:
Wenn das volck sich von
der Sünde abwendet/ vnd
Busse thut: So wil ich des
vbelß/ damit ich sie zu staf-
fen fürgenommen/ auch ab-
stehen.

Diesem nach/ wollen Wir nicht al-
lein für unsere Person/ alle unsere
Bürgerschaft/ Vortwandten vnd Zu-
gethanen/ zu rechter warer Reu vnd
Busse/ zu Gottes furcht/ vnd anruf-
fung des heylwertigen Namen GOT-
tes/ zu einem eingezogenen Leben vnd
A iij Christ-

Chriſtlichen wandel/ treulich ermanet
haben: Sondern es ſollen auch/ vn-
ſere Predicanten vnd Seelſorger (wie
ſie bißhero treulich gethan) ferner mit
ernſtem vnnnd vleißigen Ermahnen/
ſtraffe vnd troſt/ aus Gottes Wort/
zu den gewöhnlichen vnd beſtimpten
zeiten der Predigten/ vnnnd teglichen
Zuſammenkünfften/ nicht nochlaſſen/
Sondern ihe gröſſer vnd gewaltiger
die Not iſt/ vmb ſo viel deſto hefftiger
beym Volck anhalten. Wenn ſol-
ches beſchicht/ vnd wir vns zu vnſerm
lieben GOTT finden/ im Namen ſei-
nes geliebten Sohns/ vnſers HERRN/
einigen Erlösers/ Mitlers vnd Selig-
machers Chriſti IHEſu/ Gnade
ſuchen werden/ So wird vnd wil Er/
mitten im Zorne/ an ſeine Barmher-
zigkeit gedenccken/ vnd vns gnedig ſein/
Wie

Wie Er ſelbſt zuſaget: Conuertimini
ad me, & ego conuertar ad vos.

Vnnnd damit aber daneben/ auch
durch gebürliche Mittel vnd gutte Or-
dnung/ dieſer ſchweren Seuche/ ſo viel
Menſchlich vnnnd möglich/ geſteuert
vnd geuehret werde/ Als haben Wir
folgende Ordnung/ nach fürgehabtem
Rathe vnſerer Phyſicen/ Gelehrten
vnd Medicorum, ſtellen/ begreifen vnd
publicieren laſſen/ Derer ſich alle die
jenigen/ ſo vnſerem Gerichtszwang
vnd Gewalt vnterworffen/ (ſo lange
dieſe ſchwere vnnnd künmerliche
Leuffte wehren) ihnen ſelbſt
zum beſten/ gebrauchen
vnd vorhalten
ſollen.

Vnnnd

Vnd Erstlich / Demnach
Wir der auffgerichtten Ordnung
nach / diese Stadt allenthalben
auff den Gassen saubern / vnnnd
allen vnflat / mist / kericht / vnd
was mehr vn sauberkeit ist / von stat an / aus der
Stadt / an gebürende vnd dazu verordnete
ort vnd stellen zu schaffen vnd zu vorsehren /
in ernst angeordnet. So soll daneben auch
die Bürgerschaft / die Gerinne vnd Fürte für
ihren Heusern / saubern / Vnd also ein jeder
Wirt / fleissige vnd ernste vorsehung thun /
damit es inn seinem Hause / auffss sauberst vnd
reynest als immer möglich / gehalten / Vnnnd
auch für den Heusern alles so zu bösem geruch
vrsach geben möcht / weg geraumet werde.

Soll auch niemand vnreine wasser /
auch keinen Harn / es sey bey tag oder
nacht / Desgleichen kein Blut / weder von
gesunden noch krancken / auff die gassen / Son-
dern solchs entweder inn die Secret schüt-
ten / Oder ja inn den flus der Oder / vnter-
halb des Wasser Kades / bey der Stadt
Muehlmühlen / tragen vnd aufgießen.

Vnnnd

Vnd dieweil inn manchem Hause die
Secret gar vbel vnd hefftig richen / do-
durch leichtlich eine Infection an die Mens-
chen kan gebracht werden. Vnd dann nach
Bericht der Gelerten / eine Handvoll oder et-
liche vngeslechten Kalcks inn dieselben Secret
geworffen / demselben bösen Geruch / etlicher
massen stillen vnd abbruch thuen kan / Als
wird sich ein jeder / ihme selber zum besten /
dessen im fall der not zugebrauchen wissen.

So sollen die Secret wol gedackt gehal-
ten / nichts vn saubers / auch kein Knobloch /
(welchen ihr viel aus vorkerlichem kericht / in
die Secret zu werffen pflegen / vnd dadurch
schedlichen vnd erschrecklichen gestanck erre-
gen) hinein geworffen werden / Bey vnser
ernsten straffe.

DIE jenigen aber / so jetziger vngeleges-
ner zeit Bawen / Brünne / Keller / oder
sonsten zu Grunde graben / vnnnd die Erden
ausfüren vnd auffschürten lassen / welche mehr-
mals ganz stinckende vnd vbel richende ist /
offters lange zeit für den Heusern (zu wider
Vnserem zuuor außgargenen Edict.) ligen
bleibet / Dadurch die Wasserleuffe inn den
Gerinnen gehindert / die Wasser stehen blei-
ben /

ben/ ersaulen/ vnd einen bösen gefährlichen
geruch vorursachen/ Zu deme das zu solcher
aufgeführter Erden/ gemainiglich allerley vn-
flat/ hinzu geworffen vnd geschüttet wird:
Vnd vns dann gebüren wil/ mehr auff den
grössern hauffen vnd menge des Volckes/ zu
sehen/ als vmb eines oder des andern Bawes
willen/ vnnötige vnbilliche Gefahr in gemein
erregen zu lassen.

Diesem nach/ sol keiner bey jetziger geles-
genheit vnd Leufften/ Erdtrich auff die ge-
maine Strassen oder Gassen aufsüren vnd
schütten lassen/ er thue es denn mit Vnsere
vorwissen/ Consens vnd zulassen/ Bey vns
nochleisiger straff eines schweren Schockes.
Die aber so albereit Erdtrich für ihren Heu-
fern ligen haben/ sollen dasselbe vnsaublich
weg schaffen/ Bey ernster vnser straff.

Werde dann das Pflaster an einem oder
dem andern ort der Stadt wandelbar/
So sollen es die jenigen/ denen es zustehet/
vnsaublich machen vnd fertigen lassen:
Do es aber gemainer Stadt zu halten gebü-
ret/ Sol solchs Vns/ oder den Bawhern/
durch die geordneten Gassenmeyster angezei-
get werden/ Damit es gewandelt/ vnd also
inn

inn den Löchern sich das Wasser vnd andere
vnsauberkeit nicht halten/ ersaulen/ vnd bösen
gestanck geben möge.

Es soll auch niemand inn den Winckeln/
Kirchhoffen/ vnter den Schwybogen/
Hütter vnd Hering Bauden/ Sonnenkramen/
Schmár Bauden/ Rymern vnnnd Sattlern/
oder andern orten der Stadt/ vnreynen töpff/
vnd andern vnflat/ aufsetzen oder aufgießen/
seine notturst thun/ vnd also die gemainen
Ort vorunreynigen: Sondern es sol sich
dessen menniglich Jung vnd Alt enthalten/
vnd fürnemlich die Eltern ihren Kindern vnd
Gesinde solchs abschaffen/ Bey schwerer vnd
ernster vnser straffe.

DIE Becker/ Kretschmer/ Weinbren-
ner vnd Gräupner/ so wol alle andere/
so da Schweine halten vnd masten/ sollen
dieselben außwig der Stadt/ an orten vnd
stellen/ die ihnen angewiesen wird/ haben vnd
halten. So sollen auch die Kretschmer oder
ihr Gesinde/ mit dem Loger/ daraus der
Brantwein gemacht vnd geprennet wird/
also vmbgehen vnd gebaren/ das vbriger
gestanck vormieden werde.

Deßgleichen sollen die Seyffensieder vnd Liecht zieher/ das schmelzen des Inslots/ so wol die Weißgerber vnd andere/ das Leymsieden/ vnnnd was deme anhengig vnd dazu gehörig/ dauon dann ein grosser gestanck ersolget/ nirgend anderswo/ als vor der Stadt an gewöhnlichen vnd dazu verordneten orten vnd stellen/ haben/ vorrichten vnd vorbringen/ Bey der peen eines halben Schockes/ so oft hierwider gethan wird.

SUnd dieweil die gewisse Erfahrung an tag gibt/ das diese Kranckheit gar leicht ein Mensch von dem andern bekömpt/ vnnnd offters ein Mensch ihr viel Inficiren vnd vergifften kan/ dazu grosse vrsach gibt die vorsamlung vnd beywohnung vieler Menschen/ So wil von nöten sein/ vnd ersoddert die vnuermeidliche notdurfft/ das kein Weinschenck/ kein Kretschmer/ kein Weinbrenner/ dergleichen die so Gerstenbier schencken/ auch die inn den Beudlin Brantwein vorkauffen/ in ihren Heusern/ keine Wein noch Bier geste/ inn dieser gefehrlichen zeit/ setzen noch halten sollen/ Dergleichen sol es auch im Stadt oder Schweidnitzer Keller/ gehalten werden. Sondern/ ein jeder Bürger vnd Mitbürger/ soll

soll seinen Tranck/ für sich vnd seine Geste/ inn sein Haus (bis zu besserer sicherheit) heim holen lassen. Vnnnd sonderlich soll niemand vnserer Vorwandten vnd Zugethanen/ inn dieser zeit/ Zechen vnd örten zu halten/ auffm Thum/ inn den Wein oder Bierheusern/ noch auch auffm Elbing/ für S. Nicolas/ oder S. Moritz/ sich befinden lassen/ Bey der straff eines Vierdungs/ so oft es beschicht.

ES sollen auch hiemit die vorsamlungen der Schulen/ bis auff ferner anordnung/ suspendiret vnd eingestellt sein/ Damit der lieben Jugend verschonet/ vnd dadurch grössere gefahr nicht geursachet werde. Denn do es an diese ort vnter die Jugend kommen solte/ Ist leicht zu erachten/ das sich die Gefahr desto weiter inn die Stadt ausbreiten würde.

SUnd dieweil auch in den Kirchen grosse vorsamlungen des Volcks/ so ersodert die not/ Das man die Glaffenster eines grossen theils eröffne/ deßgleichen das die grossen Thüren offen gehalten werden.

So soll auch an vier orten inn der Kirchen/ auff Kolfewern/ mit Wacholderbeeren/
B iij Eychen

Eychenlaube/ Wermut/ Lorbern/ vnnnd anderem so hierzu dienstlich/ so lange das Volck beysamen sein wird/ gereuchert werden.

Ferner sollen alle gemeyne Bade auffgehaben sein/ bis zu weiterer sicherheit/ vnd Vnser ferner erkantnus vnd zu lassen.

Es sollen auch zu mehrer fürkommung vnnnd Vorhüttung dieser geschwinden Kranckheit/ die Bürger/ Hauswirte vnd Innwoner/ der Doctorn vnd Arzte gestelte Consilia, Regiment/ vnnnd inn Druck vorfaste Ordnungen/ darinnen einem jeden/ wie er sich bey diesen Leufften/ mit Reuchern vnd anderem/ inn seinem Hause vorhalten/ Wie er sich Präseruiren/ auch Curiren lassen solle/ Bericht vnd Lehr gegeben wird: Als da sind Herrn Doct. Johann. Sprembergs vnser Physici, Herrn Doct. Caspari Reglers/ vnnnd anderer Gelehrter Medicorum, für etlichen Jaren/ auch jetzo widerumb auffs New außgangen/ erkeuffen/ Vnnnd derer Bericht vnd Lehren sich frewen/ vnd gebrauchen.

Vnnnd

Vnd wann nun vber alle trewe vnnnd vleisseige fürsorge/ GOT der Allmechtige/ nach seinem Göttlichen willen/ die Seuche vber eins oder mehr Heuser vorhenge vnd kommen lesset/ Soll solchs als bald den verordneten Almosen Dienern/ angezeigt werden/ welche es folgendes den verordneten Erzten (die wir inn diesen gefehrlichen nöthen/ gemainer Stadt/ Arm vnd Reich/ zu gut bestellet vnd angenommen) anmelden/ oder ja die Personen an sie weysen vnd Remittiren werden/ Damit dieselben vleissig Insiciren vnd zuschawen/ ob solche francke Person recht Insiciret sey/ oder nicht.

Vnnnd do befunden/ das an der Infection kein zweyffel/ sondern sich dieselbe gnugsam außweyset/ Soll die Insicirte Person (dofern es Gesindel/ oder andere arme Personen/ die außser dis keine andere Bequemigkeit vnd gelegenheit haben möchten/ damit sie Curiret würden) eher besser inn das Hospital zu Allen Heyligen/ welchs man sonst das Newe Spytal zu nennen pfleget/ geführt werden/ Also alle notdurfft/ als Arzt/ Arzney/ vnnnd andere zugehör/ verordnet sein wird.

Wo

Wenn dann ein Hausvater oder Wirt/
sein Weib/ Kinder/ Freunde/ oder an-
dere Personen/ mit dieser Kranckheit
beladen würden/ denen sol beuor stehen/ Das
sie entweder als bald sich mit alle den ihrigen
aus der Stadt begeben mögen. Oder aber/
do sie solchs nicht thun/ sondern in der Stadt
vorbleiben wolten/ Sollen alle die Personen/
welche inn dem Hause sind/ sich Vierzig tage
lang innen halten/ vnd gar nicht außm Hause
gehen/ oder vnter das ander Volck komē/
damit sie andere Leute/ durch ihre Beywoh-
nung vnd gemeinschaft/ nicht Inficiren/ vnd
in gefahr setzen. So soll auch sonst niemand
bey ihnen/ außser dem verordneten Arzte/ in
das Haus gehen/ oder eingelassen werden/
Sondern ihre notdurfft/ an Speyse/ tranck/
vnd anderm/ soll ihnen durch Personen/ wel-
che bey dem Gemeinen Almuß dazu verordnet/
oder sie selbst vermögen vnd bestellen werden/
eingekauft/ vnd biß an die Hausthür/ zuge-
bracht vnd niedergesetzt/ welche folgendes die
so sich im Hause auffhalten/ werden hinein zu-
nehmen vnd zu empfangen wissen.

Das Haus aber/ darinnen die Infection
ist/ soll mit einem weissen Creutz/ welchs auff
ein schwarz Täßelein gemahlet/ vnd durch
den

den Almosen diener an das Haus angeschla-
gen/ auch hernach wider zu gebührender zeit/
wann die Vierzig tage herumher/ vnd keine
gefahr mehr vormercket würde/ vnd nicht
eher/ abgenommen werden soll/ andern zur
warnung bezeichnet werden.

Werde nun aber das Volck/ aus den
Heusern/ darinnen die Infection ist/
(dieweil man die Heuser nicht bald/ wann
Gefahr darinnen vormercket/ zuschlagen
wird) vber das erste vnd ander Verbot/ vn-
ter die Leute gehen/ oder andere Leute als nur
die verordneten Medicos, zu sich einlassen/
(Wie dann derohalben guttes vnd fleissiges
auffmercken/ durch die Nachbar/ vnd sonst/
bestellet werden sol.) So soll als dann
fürs dritte mal/ das Haus gar zugeschlagen
werden/ Also das niemand herauß oder
hinein komme/ als die jenigen/ so von Ampts
oder Cur wegen/ hinein gehören/ Doch das
die Vorsperreten/ obgehörter maß/ mit dem
zutragen vnd Handreychen sollen vorsehen
werden/ damit sie nicht mangel leyden.

Es sollen aber auch die verordneten Arzte
fleissig zuschawen/ damit sie muttwil-
liger

liger gefehrlicher weyse / keinen Menschen/
wer der sey / vorabsäumen / Sondern wann
sie erfodert / zeitlich gnug sich finden lassen.
Vnnd do nu die Seuche in ein Haus kompt/
es komme gleich der Inficirte ins Spytal/
oder bleibe im Hause / soll es dabey nicht ge-
wenden oder gnug sein / wann der Patient
Curiret vnd vorsehen wird / Sondern es sol
auch der Medicus darauff sein guttes auffmer-
cken haben / das er die andern / so nicht Infir-
cirt / vnd im Hause sind / oder vorbleiben wür-
den / trewlich vnd vleissig Præseruire / vnd
mit Arzney vorsehe / In massen dann durch
die Herrn Doctores / auff Unser vorschaffen /
inn den Apotecken / vmb ein schlecht geringe
Gelt / Recept vnd Arzneyen geordnet / wel-
cher sich nicht allein die Krancken zum Curir-
ren / sondern auch die Gesunden zum Præ-
seruire / gebrauchen sollen vnd mögen / Vnd
jeder zeit neben guttem notdürfftigem Bericht /
werden befunden werden.

Die nu aber so Arm vnd vnuormögend /
das sie solchs ihnen zu erkeuffen nicht vor-
möchten / Denen soll es aus dem Gemeinen
Almuß / auff ihr ansuchen / bezalet / vnd vmb
Gottes willen gegeben werden.

In sonder

In sonderheit / soll den geordneten Arz-
ten / hiemit inn ernst auffgelegt vnd ge-
botten sein / das sie sampt ihrem Gesin-
de vnd zugethanen / ihrem zusagen / glübben
vnd pflichten nach / mennigklich der ihres
raths vnd hülffe begeret / vmb zimliche Be-
lohnung / förderlich vnd vleissig besuchen /
Vnnd ihnen ihre hülff vnd rath auffs trew-
lichste erzeygen vnd mittheylen: Fürnemlich
sollen sie ihre Instrument / Laseysen / Salben
vnd anders / gut sauber vnnnd reyn halten /
Domit nicht vbel erger gemacht / vnnnd die
Leute nicht in gefahr gebracht werden.

Die andern Barbyrer vnnnd Arzte aber /
die sich der Krancken nicht vnderstehen / vnd
nichts minder allhier bleiben / Die werden die
jenigen / so nicht Inficirt sind / wann sie es
bedürffen vnd begeren / mit Adlerlaß vnd an-
derem / richtig vnd vleissig vorsehen.

Es sollen auch die Leute / so der Kran-
cken warten / vnd die Todtengreber /
vnter das Volck / vnd inn die Kirchen nicht
gehen.

Gleycherweiss sollen die Arzte / so des gegē-
wertigen Lauffs halber fürgenomien vnd ver-
ordnet sind / sampt ihren Dienern / die sie zu den

C ij Inficirten

Inficirten vnnnd Krancken / schicken vnd gebrauchen / sich anheymis enthalten / vnd nicht vnter das Volck gehen / Damit ihrenthalben niemanden keine scheuch vnd gefehrlichkeit / zustehe.

DIE Vendet / oder Vorkauffung der alten Kleyder / soll inn dieser gefehrlichen zeit / ganz vnd gar auffgehoben / Vnd sonderlich verbotten sein / die Kleyder vnd Bette der Krancken vnd Verstorbenen / weder heimlich noch offentlich / zu vorkauffen / oder vmbzutragen / auch nicht zu sonnen oder zu wittern.

Hiermit wollen Wir auch ernstlich befohlen haben / das niemand durch die ganze Stadt / bey den gemainen freyen Wassers Röhren / am Marckte / vnd wo sie sonst stehen / eynicherley Gewand / Bette / Zychen / Leylach / Hembde / vnd ander Geräthe / waschen soll. Vnd inn sonderheit / soll der Krancken oder Verstorbenen Bettgewand / Leynen geräthe / oder anders / was das ist / so die Krancken vmb vnd an gehabt / nirgend anderswo gewaschen / auffgehengt vnd abgetreuget werden / Denn alleine vnterhalb
der

der Stadt / inn den eussersten Abflüssen der Oder / Bey der peen eines Schockes / vnd sonst harter vnnochlessiger straffe.

Ferner wollen Wir abermaln das Betteln vnd anlauffen der Leute / auff der gassen / inn Kirchen vnd Heusern / es sey von frembden oder einheimischen / gantzlich abgeschafft haben. Dann offtermals (besonder dieser gefehrlichen zeit) durch solche Bettel Leut / inn die Heuser / auch an gesunde Personen gebracht vnd geursacht wird / das gefehrlich vnd schedlich ist.

So soll auch in den flus der Vla / nichts vnsaubers / als Kericht / todte Vihe / vnd ander vnflat / geschütt vnd geworffen werden / Bey der peen Zwölff Groschen / so offte es beschicht.

Jeweil auch bey den Hochzeitlichen Frewden / gemainiglich viel Volcks zusammen kompt / welches dann besonder inn solchen Leufften sehr gefehrlich / Als wollen Wir die jenigen / die da Hochzeitliche Frewden aufrichten sollen / mit ernst ermahnet haben / das sie es auff alle eingezognest vnd
C in stillest /

stillest/ als immer möglich / vnd ohne Tanz/
oder ja gar mit wenigem Tanz anstellen/
Auff das sie ihnen selbst vnd den ihrigen/ ge-
fahr vnd nachtheyl/ wissentlich vnd fürsetzlich
nicht gönnen oder beysügen.


Etzlich vnd Geschliefflich / wollen Wir
Alle vnser Bürger schafft/ Vorwandten
vnd Zugethanen / hiemit trewlich vnd gutto-
hertzig ermahnet haben / Demnach die
Leuffte jetzo kömmerlich vnd betrüblich / vnd
aber ihr viel (besonder denen ihr Beruff vnd
die Arbeit nicht gefallen wil) also gesinnet/
das sie es gleich für eine not/ kurzweyl oder
wolstand halten / sich teglich auff dem Rath-
hause abmahlen vnnnd sehen zu lassen: Es
wolte sich ein jeder mit seinen Sachen also
richten / das er/ so viel immer Menschlich
vnnnd möglich/ mit mennigklich/ Freundlich/
Friedlich/ vnd eingezogen lebe/ seine Gewis-
sen vnd die Liebe des Nächstens bedencke/ vnd
vnnötige Gezänck vnd widerwillen nicht ver-
ursache / Auff das die gewöhnlichen Rath-
stellen/ mit so grosser menge des Volckes/ vnd
mit gefahr / nicht erfüllet vnnnd bedrenget/
Vns auch dermassen/ wie bißhero beschehen/
vnnnd noch teglich beschicht/ so vnpillicher vnd
vnnötiger

vnnötiger weyse/ nicht zu schaffen gemacht/
vnnnd gegen so Zänckischen vnd fürwitzigen
Leuten inn andere wege zuuorfahren/ vrsach
gegeben werde. Wie sich dann hierinn/ ein
jeder Vernünfftiger vnnnd Friedfertiger der
erheyschenden Gebüer wird zu erzeygen/ vnd
zu vorhalten wissen.

I Vnnnd so dann durch diese vnser An-
ordnung vnd trewe Fürsorge (wie mennig-
klich spüren vnd erachten kan) nichts anders
als vnserer Bürger schafft/ Vorwandten vnd
Innwoner/ wolfarth vnnnd bestes/ bedacht
vnd getrachtet wird/ Als wollen Wir vns
keinen zweyffel machen / es werde sich ein
jeder/ darauff des schuldigen vnd gebürenden
Gehorsambs vorhalten. Im fall es aber
nicht beschehe/ vnd von jemanden hierin/ inn
einem oder dem andern/ muttwilliger weyse/
gehandelt vnd gebaret würde/ wollen Wir
vns hiemit/ die gebürende Straff/ ohne mit-
tel fürbehalten haben: Darnach sich Men-
nigklich zu richten/ für schaden/ gefahr/ nach-
theyl vnd Straff/ zu hütten vnd zubewaren
wisse. Decretum, XVII. Iulij.

Anno Christi: M. D. LXVIII.

Gedruckt in der
Kaiserlichen Stadt
Breslaw / durch Cri-
spinum Scharffen-
berg.



Im Jahre.

M. D. LXVIII.



